

Prin plan

Rignuvît il protocol di intese che al previôt il supuart de Provincie a specifics projets dal Ateneu

Indevant cul sosten ae Universitât

La Provincie e va indevant a sostignî la Universitât dai Studis di Udin. A palaç Belgrât al è stât firmât il protocol trienâl di intese de bande dal president de Provincie on. Pieri Fontanini e dal retôr de Universitât di Udin Cristiana Compagno che al fisse la prosecuzion de poie al ateneu furlan. Il protocol, tant che il precedent a pene scjadût, al previôt il supuart finanziari al ateneu pal trieni prossim.

«Un document - lu à definît il president Fontanini - che al dimostre la coerence de Provincie cul impegn cjapât cul popul furlan intal sostignî la Universitât dal Friûl. Ancje pai prossims trê agns l'ateneu furlan al podarà contâ sul nestri supuart, une sorte di at di ricognossince pai servizis che la Universitât e met a disposizion dal nestri teritori».

La universitât, di fat, si lei intal document, fondade sul leam profund cul teritori, e je orientade a promovî il svilup e il progès de culture e des sciencis traviars la ricercje, l'insegnament e la colaborazion scientifiche e culturâl cun istituzions talianis e forestis, contribuint cun chest in maniere significative al svilup civil, culturâl, sociâl e economic dal Friûl.

«Il protocol di intese al ateste duncje - e à precisât la professoressa Compagno - il spirt di colaborazion teritoriâl tra la Provin-



La retore de Universitât Cristiana Compagno e il president de Provincie di Udin Pieri Fontanini tal moment de firme

cie e la Universitât su projets specifics di alte formazion, internazionalizazion e ricercje scientifiche che a vedin ricjadudis positivis sul teritori».

Al 27 di Otubar dal 2008 la amministrazion provinciâl, intune cu lis representancis dai teritoris, e veve stipulât cu la Universitât il pat par sostignî e difindi in dutis lis sedis oportunis e cui imprescj plui adats, la cualitât de ufierte formative e lis ativitâts di ricercje. «La Provincie duncje - al à zontât Fontanini - e à dât daurman forme e sostance al pat traviars la assegnazion al ateneu di risorsis par iniziative di interès comun pai doi ents cun un protocol trienâl. Esaurît il prin at si va indenant».

Il document in particolâr al individue, tra lis areis di intervent, lis iniziativa finalizadis al svilup de Universitât intal cjamp de internazionalizazion, de didatiche e de ricercje, la promozion des ativitâts de Universitât traviars cunvignis, seminaris e manifestazions, consulencis scientifiche de Universitât a pro de Provincie e ancje la assegnazion di premis di lauree par svilup e discussion di tesis che a tocjin lis funzions e i servizis di competence provinciâl.